

乾隆三十三年鑄

葉天士先生著

臨證指南醫案

衛生堂藏

醫之為道微矣七情六
氣之感病非一端溫涼
寒熱之性藥非一類非
天資高妙者不可以學
醫非博極羣書者亦不

足以語醫也。今之醫者，
或記醜而不精於審脈，
或審脈而不善於處方，
或泥古而不化，或師心
而自用，或臨症不多，或

狃於偏見不能已疾而
轉以益疾又烏可以言
醫哉吳門葉天士先生
天分後人於書無所不
讀終身不能忘其視脈

也不待病者相告語而
推述病源有病者思而
後得之者不啻日周旋
於病者之側而同其寢
興飲食孰其喜怒驚悲

也蓋以其意深識病者
之意而又神明乎古人
處方之精意而直以意
斷之故其處方也一二
味不為少十餘味不為

多習見不妨從同獨用
不嫌立異輕重繫於杪
忽之間而其效在乎呼
吸及數十年之後投之
所向無不如意迎刃而

解渙然冰釋先生之名
益高從遊者日益衆而
先生固無日不讀書也
嘗記余鄉人有患痼疾
者間詣先生所為處方

授之曰服此百劑終身
不復發矣其人歸服至
八十劑蓋已霍然者月
餘矣乃止不服逾年病
復發復詣先生所先生

曰是吾令服某方百劑
者何乃如是其人以實
告令再服四十劑即永
不發矣卒如言其神妙
若是是豈俗手之意為

增損者可同年而語哉
今所存醫方若干卷皆
門弟子所錄存者學者
能讀其書以通其意則
善矣

乾隆丙戌嘉平錫山拙

脩嵇璜書於徇秋書

屋



夫事之最切於日用者

莫如醫故自軒岐道興

而靈素以下代有名人

歷有著述盧扁以後如

仲景所著傷寒金匱直

啓靈蘭之秘洩玉版之
文至若河間東垣丹溪
亦迥出凡流合仲景稱
爲四大名家傷寒暨雜
證之治療法云備矣世

咸宗之但仲景之書辭
義古奧雖經諸名家之
註疏亦未能盡晰其理
近代以來薛立齋張景
岳喻嘉言等皆本之靈

素或作或述其於諸證
皆有發明迨柯韻伯所
註傷寒能獨開生面惜
其書尚未廣行於世其
他則間有心悟闡揚亦